

- S A - F U N T A N A - D E - S A - R O C C A -

---

Pura frisca e cristallina  
 Ndi essis dae s'intragna,  
 De maestosa montagna  
 De sa Sardigna reina.

Bundante limpida vena  
 Nd'essis da intr'una rocca,  
 A bentu sol'e fiocca  
 Cun suave cantilena,  
 E curre in sa carena  
 De su monte maestosu,  
 In su canale pedrosu  
 Tra giuncos e sorighina,  
 Pura frisca e cristallina.

A nott'e die continu  
 De cantare mai cessas,  
 A lorigas e a essas  
 I sighis'in su caminu,  
 T'aunis a su trainu  
 Impare atteras funtanas,  
 Che tue puras e sanas  
 Chi de issas ses cumpagna,  
 Ndi essis dae s'intragna.

Cun prus altu murruriu  
 In gorroppos e piscinas,  
 In graniticas collinas  
 I ticchettas a su riu,  
 Das'a sa montagn'addiu  
 Cand'in piana distesa  
 Perdes friscur'e puresa  
 In terra de tue istragna,  
 De maestosa montagna.

In bassa terra piana  
 Che prima non ses prus giara,  
 Ue vivet sa zanzara  
 E cantat sempre sa rana,  
 In su ludu e in sa lana  
 I ti ses ammesturada  
 Cuni s'abba inquinada  
 In sas buccas de marina,  
 De sa Sardigna reina.

~~~~~

Corittu.

STEFANO CASULA  
 DESULO